



Broj/Broj: 03-/4-50-1-10-5-10/07  
Sarajevo/Sarajevo: 31. 10. 2007. godine

## ZAPISNIK

### **5. sjednice Zajedničke komisije za evropske integracije Parlamentarne skupštine BiH, održane 31. 10. 2007. godine**

Sjednica je počela u 10 sati.

Petu sjednicu Zajedničke komisije za evropske integracije Parlamentarne skupštine BiH sazvaio je predsjedavajući Halid Genjac.

Sjednici su prisustvovali članovi Zajedničke komisije za evropske integracije: Halid Genjac, Drago Ljubičić, Ivo Miro Jović, Alma Čolo, Zoran Koprivica, Šemsudin Mehmedović, Branko Dokić, Milica Marković, Selim Bešliagić, Hilmo Neimarlija, Azra Hadžiahmetović, te Vladana Lučić, privremeni sekretar Komisije, i Sabina Pstrocki, pripravnik-volonter. Rudo Vidović opravdano je odsustvovao.

Sjednici je prisustvovala i Elma Kadić, u ime Programa parlamentarne podrške Misije OSCE-a.

Sjednicom je predsjedavao predsjedavajući Zajedničke komisije za evropske integracije Halid Genjac.

## DNEVNI RED

1. Usvajanje Zapisnika 4. sjednice Komisije;
2. Informacija o održavanju seminara o temi „Evropske integracije“ za poslanike i delegate PSBiH, u organizaciji OSCE-ovog Programa jačanja zakonodavne vlasti, od 8. do 10. novembra 2007. godine na Bjelašnici;
3. Informacija o održavanju 10. međuparlamentarnog sastanka s Komisijom Evropskog parlamenta za Jugoistočnu Evropu, Sarajevo, 4. i 5. februar 2008. godine;
4. Tekuća pitanja.

Nakon što je jednoglasno i bez primjedbi usvojen Zapisnik 4. sjednice Komisije, prešlo se na drugu tačku dnevnog reda.

**Ad. 2. Informacija o održavanju seminara o temi „Evropske integracije“  
za poslanike i delegate PSBiH, u organizaciji OSCE-ovog Programa jačanja  
zakonodavne vlasti, od 8. do 10. novembra 2007. godine na Bjelašnici**

Svim članovima Komisije i svim parlamentarcima dostavljen je dnevni red i program seminara koji je trebalo da bude održan na Bjelašnici. Predsjedavajući Halid Genjac ukratko je informirao prisutne o predavačima i temama seminara. Zaključeno je da bi seminar bio koristan i to pogotovo za članove Zajedničke komisije za evropske integracije.

Zoran Koprivica napomenuo je da četiri člana Komisije za evropske integracije koji su ujedno članovi Zajedničke sigurnosno-obavještajne komisije i to: Šemsudin Mehmedović, Rudo Vidović, Hilmo Neimarlija kao i sam Zoran Koprivica, neće moći prisustvovati seminaru jer će boraviti u Norveškoj od 7. do 9. novembra. Njihovo putovanje nije bilo predviđeno prilikom utvrđivanja datuma o održavanja seminara, već je naknadno dogovoreno, te predložio da se seminar organizira u nekom drugom terminu.

Branko Dokić predložio je da, u slučaju da se seminar odgodi, program bude skraćen, te je napomenuo da je sličan seminar o temi 'Parlament i proces evropskih integracija' već održan u julu ove godine, i postavio pitanje da li je predviđeno da na ovom seminaru predaju isti predavači. On je naglasio kako je većini članova Komisije za evropske integracije poznato ono što se odnosi na historijat procesa evropskih integracija.

Zaključeno je da se seminar, u organizaciji OSCE-ovog Programa jačanja zakonodavne vlasti, odgodi za drugu polovinu februara 2008. godine, s obzirom da većina članova Komisije, zbog ranije utvrđenih obaveza, neće biti u mogućnosti prisustvovati seminaru u prvobitno određenom terminu.

**Ad. 3. Informacija o održavanju 10. međuparlamentarnog sastanka s Komisijom  
Evropskog parlamenta za Jugoistočnu Evropu,  
Sarajevo, 4. i 5. februar 2008. godine**

Halid Genjac obavijestio je članove Komisije da je za 4. i 5. februar 2008. predviđeno održavanje 10. međuparlamentarnog sastanka Zajedničke komisije za evropske integracije s Delegacijom Evropskog parlamenta za odnose sa zemljama Jugoistočne Evrope, koji će se ove godine održati u Sarajevu, te da je Komisija dala saglasnost za ovaj datum koji je predložio Evropski parlament. On je dodao da bi članovi Komisije trebalo da predlože teme o kojima žele da se raspravlja na ovom sastanku, te da se daju prijedlozi za dnevni red sastanka. Genjac je ukratko upoznao članove Komisije o osnovnim principima rada Delegacije Evropskog parlamenta za saradnju sa zemljama Jugoistočne Evrope i ukazao na ranija iskustva delegacije BiH na međuparlamentarnim sastancima koji se održavaju jednom godišnje, naizmjenično, u Belgiji i Bosni i Hercegovini. Selim Bešlić predložio je da jedna od tema na dnevnom redu ovog sastanka bude: Jačanje kapaciteta BiH kao uslov na putu evropskih integracija.

**Ad. 4. Tekuća pitanja**

U okviru ove tačke dnevnog reda razmatrano je sljedeće:

**a) Pripremni sastanak Regionalnog stola i radnih stolova Pakta stabilnosti Jugoistočne Evrope**

Pripremni sastanak zakazan je za 15. 11.2007., u 11 sati, u Maloj sali, u Ministarstvu vanjskih poslova BiH. Predsjedavajući Komisije Halid Genjac naglasio je da će nakon tog sastanka kolegiji oba doma odlučiti o prisustvu predstavnika PSBiH (Zajedničke komisije za evropske integracije), na redovnom polugodišnjem sastanku Regionalnog stola i radnih stolova Pakta stabilnosti Jugoistočne Evrope i bit će imenovana delegacija koja će putovati u Tiranu. Odlučeno je da će pripremnom sastanku prisustvovati Sabina Pstrocki, volonter-asistent u Zajedničkoj komisiji za evropske integracije.

**b) Informacija o posjeti dva člana Zajedničke komisije evropskim institucijama u Briselu**

Predsjedavajući Halid Genjac i zamjenik predsjedavajućeg Drago Ljubičić boravili su u Briselu, a ovu posjetu organizirao je NDI - Nacionalni demokratski institut, i to uz podršku Evropskog parlamenta. Halid Genjac predložio je da se nađe sponzor za slično studijsko putovanje, odnosno da se organizira posjeta institucijama EU za sve članove Zajedničke komisije za evropske integracije. Branko Dokić predložio je da bi bilo korisno da se organizira posjeta zemljama koje su nedavno primljene u Evropsku uniju - Sloveniji, Mađarskoj, Češkoj, Bugarskoj, Rumuniji i dr. Alma Čolo pitala je da li postoji neki redoslijed kod imenovanja delegacija za posjete i da li Sekretarijat ima ulogu u tome, te je predložila da se pravi razlika između poziva koji dolaze na Sekretarijat i onih koji dolaze za poslanike. Istakla je da se prilikom imenovanja parlamentarnih delegacija vodi računa o tome ko je poslanik a ko državni službenik.

Zaključeno je da kao i do sada o svim putovanjima u inozemstvo odlučuju kolegiji oba doma, a o putovanjima članova Zajedničke komisije za evropske integracije odlučuje se na sjednicama Komisije.

**c) Upućivanje pisma predsjedavajućoj Delegaciji Evropskog parlamenta za odnose sa zemljama Jugoistočne Evrope gospodi Doris Pak**

Branko Dokić predložio je da se uputi pismo Evropskom parlamentu u Briselu, odnosno predsjedavajućoj Delegaciji EP za odnose sa zemljama Jugoistočne Evrope Doris Pak i da se obavijesti da je došlo do dogovora o reformi policije, te da EP prihvati taj dogovor kao ispunjenje uslova za parafiranje Sporazuma o stabilizaciji i pridruživanju. On je dalje istakao da je intervju prikazan na RTRS-u prije 3-4 dana pokazao kako je Doris Pak neobaviještena, te da se stvara slika na osnovu pogrešnih informacija, a da je intervencija potrebna samo u smislu tačne informacije koja se odnosi na Parlament i Vijeće ministara BiH. Halid Genjac odgovorio je da svaki član Komisije ima legitimno pravo da iznese svoje lične stavove i da se lično obrati Doris Pak. Branko Dokić prihvatio je objašnjenje i izjavio da će lično poslati pismo Doris Pak.

Na prijedlog predsjedavajućeg Genjca, zaključeno je da se, zavisno od razvoja situacije, uputi pismo u ime Zajedničke komisije u koordinaciji tri člana Komisije, odnosno Halida Genjca, Branka Dokića i Ive Mire Jovića.

#### **d) Organiziranje predavanja o temi evropskih integracija**

Branko Dokić predložio je da članovi Komisije održe nekoliko predavanja po gradovima širom BiH, koja bi se odnosila na proces evropskog integriranja BiH, kao i njenih obaveza prema EU.

Hilmo Neimarlija dodao je kako je zaista potrebno šire informiranje javnosti o evropskim institucijama, o demokratiji, te da članovi Komisije budu u ulozi predavača i da afirmiraju vrijednosti evropskog puta. On je podržao inicijativu i naglasio kako je potrebno uspostaviti jasan odnos između evropskog puta i identiteta, odnosno diverziteta, pri čemu se pozvao na ono o čemu je govorio gospodin Teri Dejvis.

Milica Marković podržala je prijedloge Alme Čolo i Branka Dokića i naglasila da se svi moraju aktivnije uključiti u razvijanje dijaloga s građanima.

Azra Hadžiahmetović složila se s idejom da se organizira nekoliko predavanja koja se odnose na proces evropskih integracija, te podržala proaktivno djelovanje Komisije i predložila da se što više čuje glas Komisije, kao i da se inicijativa uputi i ostalim institucijama koje djeluju unutar ovog procesa.

Zaključeno je da se u Plan rada Komisije za narednu godinu uvrsti organiziranje javnih tribina na kojima će članovi Zajedničke komisije u neposrednom kontaktu s građanima govoriti o procesu integriranja BiH u EU.

Sjednica Komisije završena je u 12 sati.

Predsjedavajući  
Zajedničke komisije  
Halid Genjac